



§. III.

NVM FORMVLA CONSENSVS LVB. SIT LIBER SYMBOLICVS?

Ad rem ipsam quod attinet, primum oritur quaestio, an pro libro, vel libello aliquo symbolico Formula nostra habenda sit? Aientium partes tuetur celeberrimus BAVM-GARTEN, *in Anhang zu den Erleuterungen der Symbol. Bücher* pag. 306. inter libros symbolicos eandem referens particulares. Quam quidem sententiam comprobare maxime videtur Subscriptio, Formulae huic adiecta; quae subsignantium sibi coniunctam habet obstrictionem, sese scilicet in sacro, quod offertur, munere nihil unquam, hisce promissionibus contrarium, esse docturos: id quod character quasi est, qui scripta symbolica ab omnibus omnino aliis discernat. Prouoco ad Venerandi Praesidis *Theologiam Symbol.* (cuius primae tantum septem plagulae ante undecim annos impresa sunt) *Prol. C. I. §. 16. & 17.* Verum enim vero dum rem penitus consideramus, apparet, solam subscriptionem non unice librum efficere symbolicum. Requiritur etiam, ut dogmata quaedam determinentur, certae veritates amplectendae proponantur, earundemque oppositi reiiciendi errores indicentur; teste iterum Celeb. D. FEVERLINO *I. c. §. I.* Iam vero quum hae praecipui momenti res desint in Formula Lubecensi, symbolici libri denominationem eidem quam minimè competere, clarum est. Quia tamen Errantes quidam, e. gr. Osiander, Suenkfeldius, Caluinus, Thammerus, hic nominantur, idque nihil aliud sibi velle vide-